

Ngātoroirangi

Mā te Pouako

Ngā Ihirangi

He Maioha 2

He Kōrero Whakapuaki 3

Ngā Mahere Ako

1. Te Kāwai Whakaheke 5

2. Ngā Uara Rerekē 9

3. Te Whaiāipotanga 13

4. Te Mahi a te Rangatira 17

5. Te Au Moko 21

Te Tuaiwi Tikanga ā Iwi 24

He Tāruatanga Matua 26

Kupu Taka 34

Hei Mahi 3

Arā ētahi rōpū motuhake kei te kaha tā rātou mahi moni i ngā rawa taiao o Tongariro. Ka rapu utu ngā ākonga mō ētahi momo mahi whakangahau ki te taiao o Tongariro. He mahi ā-rōpū tēnei. He 1 haora te roa o te mahi.

- Ka rangahaua e ngā ākonga ngā utu mō ngā tūmomo mahi whakangahau ki Tongariro. Kei te Ipurangi ngā kōrero. Tēnā tirohia **He Rauemi** e whai ake nei mō ētahi.
- Whakaritea ngā kōrero nei ki roto i tētahi papatau hei whakaaturanga. Anei tētahi tauira papatau:

Te tūmomo mahi	Te utu tangata kotahi	Te utu ā-whānau
Te rīhi pūtu me ngā papareti huka		
Te utu i ngā tūru piki maunga		
Te hoko kai mō te rā		
Te utu wāhi moe kia kotahi te pō		
Te utu kai hapa, parakuihi hoki		
He utu anō pea?		
Te tapeke utu	\$	\$

- He aha hoki ētahi atu mahi e taea te mahi i Tongariro i ēnei rā? He mahi kore utu anō?

Hei Mahi 3

Ka wānangahia tēnei mea te ‘aroha’ i te wā i a rātou, me te whakataurite ki ngā āhuatanga o ēnei rā.

He waiata aroha hoki i titoa e Mahutu Te Toko mō Rihi Puhīwahine. I tētahi hui nui ka tūtaki tahi anō te tokorua nei. Ahakoa te maha o ngā tau, kua mau tonu te aroha i a rāua, tētahi ki tētahi. I taua hui, ka tū a Rihi Puhīwahine, ka tuku i tana waiata aroha, a *Ka Eke ki Wairaka*. Ka tū hoki a Te Toko, ka waiata ki a Rihi. I a rāua e waiata tahi ana, ka piri tahi, ka heke ngā roimata.

He tino kōrero whaiāipo te kōrero nei mō Rihi Puhīwahine rāua ko Mahutu Te Toko. I mau tonu te aroha nui o tētahi ki tētahi, ahakoa ngā tau.

- Whakarongo ki te waiata aroha a Te Toko. Kei te kōpae puoro *He Puia, he Iwi*.
- Akohia ngā kupu. Kei te tāruatanga matua 3E (whārangi 32) ngā kupu me ētahi whakamārama.
- Matapakia e koutou ko ngā ākongā ētahi kōrero whaiāipo rongonui anō.
- Tono ki a rātou kia whakaemia ētahi kōrero aroha, ka pānui ā-waha atu ki te ākomanga.
- Tonoa ngā ākongā kia āta whakaaro ake ngā mahi whaiāipo o te wā o nehe me ngā mahi whaiāipo o te wā nei hoki.

Anei ētahi tauira pātai:

- He aha ō koutou mōhiotanga ki ngā tikanga nei?
- He aha ngā momo tikanga i ēnei wā e moe tahi ai tētahi i tētahi?
- He aha ngā momo tikanga o mua i moe ai tētahi i tētahi?
- He aha ngā tino pūtake i puta mai ai ēnei tūmomo tikanga?

Ka tuhia ngā whakautu ki tētahi papatau.

Matapakia mehemea he painga kei te kitea i roto i ngā tikanga tawhito mō ēnei rā.

- Me mau tonu, kāore rānei?
- He aha i pērā ai ō rātou whakaaro?

He Aromatawai

Ka tuhia anō ā rātou whakautu ki te papatau. Kua mau ā-hinengaro ngā kupu me te rangi o te mōteatea nei.

Kua whakaaringia ngā tūranga o Puhīwahine mā.

Kua akohia ētahi tikanga mō tēnei mea te moe tahi a te tāne i te wahine me ngā tikanga whaiāipo i ngā rā o mua, i ēnei rā hoki.

He Rauemi

He Waiata Onamata – Songs From the Past
Te Reo Rangatira Trust (1998)

Tikanga Whakaaro
Cleve Barlow, Oxford University Press (1994)

Te Whare Kohanga and its Lore
Elsdon Best, Te Papatongarewa (1929)

Mahere Ako 4

Te Mahi a te Rangatira

Ka tirohia ngā mahi mīharo a Ngātoroirangi, kātahi ka tūhuratia e te ākongā ngā *huānga* me ngā *kounga* o te rangatira o neherā. Ka whakatauritea hoki aua āhuatanga ki ngā rangatira o ēnei rā.

Ka hiahiatia

he kōpaki	he kutikuti
he papatau	he pepa pango A3
he taputapu mahi ā-toi	he rākau kapia
he tāruatanga matua 4	
<i>Heroes</i> , nā Alan Duff	
<i>Ngā Tāngata Taumata Rau, 1769-1869</i> , nā Te Tari Taiwhenua	
<i>Ngātoroirangi</i> , nā Hēmi Te Peeti	

Hei Mahi 1

He titiro ki ngā kounga o te rangatira. He mahi takirua tēnei. He 1 haora te roa o te mahi.

Anei ētahi whakamāramatanga poto mō ngā kounga o te rangatira ki tō te Māori whakaaaro:

Kī tahi – he pono ki tana kupu

Mate ururoa – he kaha ki te whakatuktuki i ana mahi

Ringa whero – he ringa wera, he pukumahi

Manaakitanga – he kaha ki te tiaki tangata

- Tuhia ēnei kupu ki runga i te papatuhi:
mana tangata
mana atua
whakapapa
- Tonoa ngā ākongā e mahi takirua ana kia wehewehe i ngā rerenga kōrero, kia toru ki ia tino āhuatanga.
- Ka matapakia e ia tokorua he aha i pērā ai tā rāua wehewehe.
- Ka pūrongotia mai e ētahi ngā take i pērā ai tā rātou mahi.

Hei Mahi 2

He mahi tēnei kia mau ā-tohu i ngā mahi rangatira a te tupuna nei. He mahi takitahi tēnei. He 1 haora te roa o te mahi.

- Mā te pouako tētahi papatau (3 x 3 ngā pouaka) e tuhi ki tētahi pepa A4. Ka tuhia ngā nama 1–9 ki ngā pouaka.
- Tāruatia te pepa kia riro i ia ākongā tētahi. Tohaina ngā papatau ki ngā ākongā.
- Āta pānuihia ngā rerenga kōrero e iwa kei te tāruatanga matua 4 (whārangi 33) ki ngā ākongā.
- Tonoa ngā ākongā kia tā pikitia mō ia rerenga kōrero ki roto i ngā pouaka o te papatau i a koe e pānui ana.
- Raua ngā rerenga kōrero (i tapahia mai i te tāruatanga matua 4) ki roto kōpaki (me tīrango i te tuatahi). Tohaina kia kotahi anō te kōpaki ki ia ākongā.
- Tonoa ngā ākongā kia tapahia te whārangi papatau kia 9 anō ngā wāhanga.
- Whakapiria raupapa ana (1–9) ki te pepa pango.
- Kātahi anō ka whakapiria ngā rerenga kōrero (1–9) ki raro i te pikitia e tika ana.
- Ka matapakia takiruatia ngā mahi.

Hei Mahi 3

Mā te mahi toi ka puta anō ngā mahi a te rangatira nei, a Ngātoroirangi. He mahi takitahi tēnei. He 1 haora te roa o te mahi.

- Me whiriwhiri e te ākongā tētahi rerenga kōrero me tōna anō pikitia paku.
- Mā te pouako te momo mahi toi e whiriwhiri, māna anō te taha ki te pūkenga toi e ārahi.
- Ko te wā e tukuna mō te mahi toi, ko tērā e tutuki pai ai ngā mahi ki tā te ākongā titiro.
- Ka whakaarohia e te ākongā te pātai nei, 'He aha te tohu o te rangatira kia whakaaturia ki tēnei pikitia?'
- Ka tuhia e te ākongā tētahi kōwae kōrero e pā ana ki tana pikitia, kia tāpiri atu ki raro iho.
- Ka whakairihia ngā pikitia me ngā kōwae kōrero ki tētahi pakitara i raro i te tapanga, 'Ko ngā tohu a te rangatira, a Ngātoroirangi.'

Hei Mahi 4

Ka rangahau kōrero te ākonga e pā ana ki tētahi o ngā tāngata Māori rongonui. He mahi rangahau, he mahi takitahi tēnei. He 45 meneti te roa o te mahi.

- Ka kōwhiria e te ākonga tētahi o ēnei tāngata rongonui:

O mua

Hinemoa

Māui

Te Puea Hērangi

Te Rauparaha

Tētahi atu

O nāiane

Tō kuia, koroua rānei

Wairangi Koopu

Keisha Castle-Hughes

Te Ataarangikaahu

Tētahi atu

- Mā te pouako ngā pukapuka, ngā tuhinga poto, ngā pae ipurangi rānei (e pā ana ki ēnei tāngata rongonui) e whakarite hei āwhina i ngā ākonga.
- Ka whakautua e te ākonga ngā pātai e whai muri nei i roto i tana tuhinga whakarāpopoto kōrero mō te tangata rongonui.
 1. Ko wai tōna ingoa?
 2. Ko wai tōna waka me t/ōna iwi?
 3. He aha ngā tino mahi a te tangata nei, te take e rongonui ana ia?
 4. He rangatira, he rongonui rānei te tangata i whiriwhiria.
- Kia 2–3 ngā kōwae o te tuhinga.

Hei Mahi 5

He tuhi *koioranga tangata* tēnei mahi, kia akohia te *whakahiato mōhiohio* mai i ngā pukapuka i runga i te kaupapa tangata. He mahi motuhake tēnei.

Tuhia ēnei pātai ki te papatuhi hei arotahi mō te tuhi koioranga tangata.

- He aha ngā mīharotanga o te oranga o te tangata nei?
- He mahi *pārekareka* āna? He aha nā?
- He aha tētahi o āna mahi *whakahihiri*?
- He aha āna tino *whakatutukitanga*?

Tuhia hoki ēnei pātai hei arotahi mō te whakahiato mōhiohio.

- He aha ngā tino mōhiohio i rangahaua e whakaatu ana i te rongonui o te tangata?
- Nō hea ēnei mōhiohio?
- Ko ēhea mōhiohio ka waiho, ko ēhea ka whakaurua ki tō tuhinga? He aha i pērā ai?

Whakaaturia te tuhinga mā te **Whakaaturanga Pūmanawa**.

Hei whakakapinga kaupapa, whakatūria tētahi **Rā Whakanui i ngā Rangatira**.

- He whakaatu i ngā mahi rangahau a ngā ākonga.
- He whakanui rānei i tētahi rangatira anō i tautuhia hei kaupapa whakaatu mō te akomanga katoa.

He Aromatawai

Kua taea e te ākongā te tautuhi i ngā *ariā matua* o ngā kōrero ka pānuihia e ia mō Ngātoroirangi.

Kua tā pikitia te ākongā e mau ai tētahi o ngā ariā matua nei.

Kua taea e te ākongā te rangahau kōrero mō ngā kōunga o tētahi rangatira o te rautau 20.

Kua ako ki te whakahiato mōhiohia e pā ana ki te tangata rongonui.

Kua tuhia e te ākongā tētahi koioranga tangata, ā, ka whakaaturia ki te katoa.

He Rauemi

Ngātoroirangi

Hēmi Te Peeti, H.A.N.A. Ltd. (2004)

Heroes

Alan Duff, Random House N.Z. (2000)

Ngā Tāngata Taumata Rau

1769–1869, Te Tari Taiwhenua (1990)

www.dnz.govt.nz/dnz/Maori_default.asp

New Zealand Dictionary of Biographies website

Mahere Ako 5

Te Au Moko

Ka tirohia tō te Māori whakaaro me tō te ao Pūtaiao whakaaro e pā ana ki te ahunga mai o te puia me ngā ngāwhā ki Aotearoa nei.

Ka hiahiatia

he hinu	he <i>paura houru</i>
he huka	he <i>huka rewa</i>
he kōhua	he pune
he pae	he uku
he pae tunu	he wai
he pukapuka mahere whenua o te ao	
he tāruatanga matua 5	

Hei Mahi 1

Ka tuhia ki tētahi mahere whenua te haerenga mai o Te Hoata rāua ko Te Pupū. He mahi takitahi tēnei. He 45 meneti te roa o te mahi.

Ki tā ngā kaipūtaiao, ko te mahi a ngā nukupapa tērā e ngunguru ai te whenua, e pahū mai ai he puia, he ngāwhā. Ko te wera o te *nukuratarata* i raro i te *kirinuku o Papatūānuku* e pana whakarunga ana, ā, ko ngā tūtakitanga o ngā nukupapa ngā tino wāhi e kaha puta mai ai ngā puia, ngā waiariki me ngā rū whenua.

- Tohaina ki ngā ākongā tētahi mahere o Te Ika a Māui kei te tāruatanga matua 5 (whārangi 35).
- Ka pānuihia e te pouako ngā whiti o *Ngātoroirangi* (whārangi 13–16) e hāngai ana ki te huarahi i whāia e Te Hoata rāua ko Te Pupū kia tae atu ai rāua ki a Ngātoroirangi.
- Ka āta tuhia e te ākongā ngā wāhi i whakahuatia ki te mahere, me ētahi atu wāhi e mōhio ana rātou kei reira he puia, he puna waiariki rānei. Mā tētahi pukapuka mahere whenua ngā ākongā e āwhina.
- Ka tirohia te *au moko o te whenua* kei te pukapuka *New Zealand Historical Atlas*.
- Matapakia ō rātou whakaaro mō te au moko o te whenua.

Hei Mahi 2

Ka tunu hokipoki ngā ākongā kia mārama pai rātou ki ngā āhuatanga o tēnei mea te *rangitoto*. He mahi ā-rōpū tēnei. He 30 meneti te roa o te mahi.

- Kotahi te kōhua me te pae tunu ki ia rōpū. Whāia ngā tūpatotanga ki roto kāuta kia kore ai ngā ākongā e whara.
- Raua atu ki te kōhua:
 - Kia rima ngā pune nui o te huka.
 - Kia rua ngā pune nui o te huka rewa.
- Kōroringia me te āta whakawera anō ki te tō. Me kōrori tonu kia koropupū te ranunga. Whakahekengia te kaha wera, ka āta tunu mō te 4 meneti.
- Ka kōrori anō i ētahi wā.
- Tangohia i te tō, ā, tāpirihia ki te ranunga: Kia kotahi te pune iti o te paura houru.
- Kōroringia anō, ka rau atu ki tētahi pae kua pania ki te hinu.
- I mua i te kai i te rare nei, kōrero tahi koutou mō te wā i tāpirihia ai ko te paura houru. He rite ki te rangitoto e puta mai ai i ngā puia i ngā wā ka hū.

Hei Mahi 3

Ko ētahi pahekotanga o te tangata ki te taiao kei te aroa e ngā ākongā i tēnei mahi. He mahi ā-rōpū tēnei. He 1 haora te roa o te mahi.

- Mā tēnā, mā tēnā anō ākongā e whakaaro mehemea ko ia te rangatira o tana iwi, e rapu whenua ana hei kāinga mō rātou.
- Me whakaaro e rātou te hanga whakaruruhau, te rapu kai te aha atu rānei.
- Ko te pikitia o te pā i raro i ngā ngāwhā i Te Ketetahi kei te aroa e ngā ākongā. Kei te pukapuka *Tongariro, a sacred gift* nā Craig Potton (whārangi 126) tētahi whakaahua.
- Ka āta tirohia te pikitia o te wharenuui i raro iho i ngā ngāwhā i Te Ketetahi, ā, ka kōrerohia ngā āhuatanga o te taiao e tū mai rā te wharenuui nei i Ōtūkou.

Ko ētahi pātai ki ngā ākongā:

1. He aha, ki ō koutou whakaaro, ētahi tino take i whakatūria ai te wharenuui nei ki tēnei wāhi?
2. He aha ētahi āhuatanga o te taiao nei kāore pea i te tino pai hei nohoranga mō te tangata?
3. I ēnei rā i te taiao nei i Tongariro, he aha ētahi whakamahinga o ēnei wāhi?

Ko ētahi tauira whakautu:

1. He tata ki te roto o Rotoaira, ko te wai, ko ngā momo kai wai māori kei reira. Ko ngā puna waiwera o Te Ketetahi hei wāhi kaukau, hei wāhi tunu kai. Ko te wāhi e tū ana te whare, he raorao (arā, he āhua papatahi te whenua), he pai mō te kerī i ngā mōra kai.
2. Kāore pea i te pai tētahi wāhi puia, kei pahū anō ērā puia. Kāore pea i te pai tēnei wāhi hukarere, hau tonga hoki, kei makariri rawa rātou.
3. Ka whakamahia te taiao nei i ēnei rā hei wāhi retireti hukarere, hei wāhi hīkoikoi. Ko ngā momo mahi ngahau kei te whakahaeretia i konei mā ngā tūruhi. Arā anō ngā mahi tiaki taiao a Te Papa Atawhai me ngā mahi rangahau a ngā kaupūtaiao hoki.

Hei Mahi 4

He mahi uku. He mahi takitahi tēnei. He 30 meneti te roa o te mahi.

- Ka noho ngā ākongā ki mua i tētahi wāhanga uku, i tētahi ipu wai me tētahi rākau iti.
- Kua kōparea ngā karu ki tētahi papanga kia kore ai ngā ākongā e kite i te uku.
- He whakatangi waiata tā te pouako (*Ka Eke ki Wairaka*), he pānui kōrero rānei (*Ngātoroirangi*).
- Ka waihanga ngā ākongā i tētahi āhua e whakaatu ana i ō rātou whakaaro mō 'te au moko o te whenua'.

Ko te au moko o te whenua, kei te kiri o Papatūānuku. Kei roto i tana kōpū, ko Rūaumoko e ngunguru nei. Ko te au moko o te whenua tērā i whakairohia e Te Hoata, e Te Pupū.

Ko ngā nukupapa ērā kei te nekeneke, kei te panapana, kei te tīhorehore i te kiri, e puta ai ko ngā rū whenua, ngā puia me ngā ngāwhā.

- Kia 20 meneti pea te roa o te mahi. Ka tuku ia tamaiti i tana hā ki runga i te mea kua hangaia e ia, hei tuku mauri atu ki roto.
- Kātahi ia ākongā ka kōrero mō tana waihangatanga.
- Ka whiriwhiri mehemea ka whakahokia ngā hanga uku ki te kāinga, ka tukua rānei kia tunua ki te umu uku, ka haria rānei ki waho kia tū anō ki runga i a Papatūānuku, ā, ā tōna wā rā anō, mā te hau me te ua, ka hoki te uku ki tana *ūkaipō*.

He Aromatawai

Kua hanga mahere whenua te ākongā e kitea ai te ara i heria mai ai ngā puia me ngā ngāwhā ki Aotearoa.

Kua mārama te ākongā ki ētahi o ngā ariā o te ao pūtaiao mō te pūtake o ngā puia me ngā ngāwhā.

Kua mahi tahi rātou ki te tunu hokipoki, ā, ko te aromatawai nui – he whakatau pēhea rawa te reka!

Kua mārama te ākongā ki ētahi pahekotanga a te tangata ki te taiao, arā, ko ngā take e whakatauria ai he pai tētahi momo wāhi hei wāhi noho.

Kua waihangatia ki te uku tētahi tino hanganga e pā ana ki te au moko o te whenua, ā, kua whakamāramahia atu.

He Rauemi

Volcanoes of the South Wind – A field guide to the Volcanoes and Landscape of Tongariro National Park
Karen Williams, Tongariro Natural Historical Society (Inc.) N.Z. (2001)

Tongariro, a sacred gift

Craig Potton, Lansdowne Press & Craig Potton (1987)

The Restless Land: Stories of Tongariro National Park World Heritage Area

Tongariro/Taupo Conservancy Department of Conservation & Tongariro Natural History Society (Inc.) (1998)

Discover New Zealand Volcanic Places

Gordon Ell Press (1986)

New Zealand Historical Atlas, Ko Papatūānuku e Takoto Nei

Bateman & The Department of Internal Affairs (1997)

Te Tuaiwi Tikanga ā Iwi

Mahere Ako	He Tirohanga Whānui	He Puia, he Iwi	Whenu
1 Te Kāwai Whakaheke	Ka tirohia ngā uaratanga Māori e pā ana ki ngā pūmanawa me ngā pūkenga ka heke i te kāwai whakaheke.	Ngātoroirangi whiti 1–2, whārangi 1–2	Te Ahurea me te Tuku Ihotanga, taumata 4, whārangi 56–57
2 He Uara Rerekē	Ka tirohia ētahi uara rerekē e pā ana ki te whakamahinga o te rawa taiao. Ka rangahaua e ngā ākonga ngā pūtake e rerekē ai ngā uara o ngā rōpū rerekē.	Ngātoroirangi whiti 16, whārangi 16	Ngā <i>Rawā</i> me ngā <i>Mahinga Ohaoha</i> , taumata 4, whārangi 113–114
3 Te Whaiāipotanga	Ka rapu māramatanga ngā ākonga mō te tikanga <i>tomo moe</i> o ngā wā o mua, ā, ka whakatairitea ki ngā tūmomo <i>tikanga whaiāipo</i> o te wā nei.	Ngātoroirangi whiti 12–14, whārangi 12–14	Te Ao Hurihuri, taumata 3–4, whārangi 72–73
4 Te Mahi a te Rangatira	Ka tirohia ngā mahi mīharo a Ngātoroirangi, kātahi ka tūhuratia e te ākonga ngā <i>huānga</i> me ngā <i>kounga</i> o te rangatira o neherā. Ka whakatauritea hoki aua āhuatanga ki ngā rangatira o ēnei rā.	Ngātoroirangi whiti 1–16, whārangi 1–16	Te Whakarite Pāpori, taumata 3, whārangi 32–34
5 Te Au Moko	Ka tirohia tō te Māori whakaaro me tō te ao Pūtaiao whakaaro e pā ana ki te ahunga mai o te puia me ngā ngāwhā ki Aotearoa nei.	Ngātoroirangi whiti 13–16, whārangi 13–16	Te Wāhi me te Taiao, taumata 4, whārangi 93–95

Whāinga Mātāmua	Whāinga Paetae	Tukanga
<p>I roto i te akoranga o ngā whenu ka mārama te ākongā ki:</p> <ul style="list-style-type: none"> te whai wāhitanga o te ahurea me te tuku ihotanga ki te tuakiri o te tangata; te āhua me ngā rokohanga o te pahekotanga ahurea. 	<p>Ka taea e te ākongā te whakaatu i ōna mōhiotanga me ōna māramatanga ki:</p> <ul style="list-style-type: none"> ngā take me ngā huarahi e tuku ihotia ai e te takitahi me ngā rōpū ō rātou ahurea me ō rātou tuku ihotanga, kia pūmau tonu. 	<p>Te Pakirehua, taumata 3–4, mata 2, 3, 4 Te Tūhuratanga Uara, taumata 3–4, mata 1</p>
<p>I roto i te akoranga o ngā whenu ka mārama te ākongā ki:</p> <ul style="list-style-type: none"> te take me ngā huarahi e uara ai, e whanake ai te tangata i ngā rawa. 	<p>Ka taea e te ākongā te whakaatu i ōna mōhiotanga me ōna māramatanga ki:</p> <ul style="list-style-type: none"> te take me ngā huarahi e rerekē ai te titiro me te whakamahi a te tangata i te rawa me te rokohanga o ēnei āhuatanga; te take me ngā huarahi e whai ai te takitahi me te rōpū kia whakahaumarū ngā motika o te kaiwhakapeto. 	<p>Te Tūhuratanga Uara, taumata 3–4, mata 1, 2, 3</p>
<p>I roto i ngā akoranga o ngā whenu, ka mārama te ākongā ki:</p> <ul style="list-style-type: none"> ngā pānga o waenga i te tangata me ngā tūāhua i roto o te wā. 	<p>Ka taea e te ākongā te whakaatu i ōna mōhiotanga me ōna māramatanga ki:</p> <ul style="list-style-type: none"> te whakaawenga whakaaro me ngā mahi a te tangata i ngā wā o mua, i te oranga o ētahi atu; ngā huarahi e taea ai e te takitahi me te rōpū te urupare ki te panoni. 	<p>Te Whakatauranga Kaupapa Pāpori, taumata 3–4, mata 1, 3</p>
<p>I roto i ngā akoranga o ngā whenu, ka mārama te ākongā ki:</p> <ul style="list-style-type: none"> ngā motika, ngā tūranga me ngā haepapatanga o te tangata i a ia e pāhekoheko ana i waenga rōpū. 	<p>Ka taea e te ākongā te whakaatu ōna mōhiotanga me ōna māramatanga ki:</p> <ul style="list-style-type: none"> ngā āhuatanga o te whakawhiwhinga me te whakahaerenga o te tūranga o te kaiarataki rōpū. 	<p>Te Pakirehua, taumata 3–4, mata 1, 2 Te Tūhuratanga Uara, taumata 3–4, mata 1</p>
<p>I roto i te akoranga o ngā whenu ka mārama te ākongā ki:</p> <ul style="list-style-type: none"> ngā pahekotanga o te tangata ki te wāhi me te taiao. 	<p>Ka taea e te ākongā te whakaatu i ōna mōhiotanga me ōna māramatanga ki:</p> <ul style="list-style-type: none"> te whakaatatanga o te wāhi i ngā pahekotanga o te tangata ki te taiao i te wā o mua; te take me ngā huarahi e mōhio ai te tangata ki te wāhi me te taiao. 	<p>Te Pakirehua, taumata 3–4, mata 2, 3, 4 Te Whakatauranga Kaupapa Pāpori, taumata 3–4, mata 2</p>



Ko Pūhaorangi	Nāna ko Tangimoana
Nāna ko Ohomairangi	Nāna ko Kahukura
Nāna ko Ruamuturangi	Nāna ko Rangitakumu
Nāna ko Taunga	Nāna ko Mawakenui
Nāna ko Atuamatua	Nāna ko Mawakeroa
Nāna ko Rakauri	Nāna ko Mawaketaupō
Nāna ko Ngātoroirangi	Ka moe i a Haahuru
Nāna ko Tangihia	Ka puta ko Tūwharetoa



Te Whare Kōhanga

Ko enei kupu e whai ake nei he mea tuku mai e Hori Ropiha o Waipawa i te tau 1893

Ko nga wahine Maori kaore e mate i te whanautanga tamariki, ahakoa nui nga tamariki a te wahine Maori e whanau ai kore rawa atu e mate. He pai rawa atu nga wahine o te iwi Maori, he kaha rawa atu, he nui te ora, he matau rawa atu ki te whakawhanau tamariki, kore rawa atu e mate. Inaia nei nui rawa atu nga wahine Maori kua mate, e tae ana pea nga wahine e mate ana i te tau kotahi ki te kotahi rau, neke atu ranei ki te rua rau.

Ko tenei mate i matemate ai nga wahine Maori na nga rongoa pakeha, ko tetahi na nga kai pakeha, ko tetahi na nga kakahu pakeha, nui atu hoki o te pakeha mate i nga tairo a Kupe. Ko tetahi mate kua mahue to nga Maori mana, me ona karakia, me ona tapu Maori, me ona ritenga katoa, ona kakahu me ana kai. Kua pakeha i naia nei nga Maori, me nga kai, me nga kahu, me nga rongoa, a he nui hoki nga mate e pa ana ki nga wahine Maori.

Ka whanau a Hine-rauwharangi i te Aonui o te Orongonui o te tau. Ka kawea te whaea ki roto i Hui-te-ananui noho ai, me tona tamahine. No te whakatarepatanga i te iho o tona tamahine kahurangi ka whakaputaia mai ki waho o te whare, ki te roro o taua whare, ki runga i nga takapau wharanui raua ko tona whaea noho ai. Ka whakatata atu te maru iwi, te maru tangata ki te marae o Hui-te-ananui. Ka tu a Tupai, taina o Tane, i a ia hoki te ipu tapu, ka mau nga ringa ki te tamaiti, ka okookotia ki toro i ona ringa; koia tenei tona karakia:

*Nau mai, E hine wairoro!
Whakaea, whakaea to uru tapu
Whakaea, whakaea to uru tipua
Whakaea, whakaea to uru waiora ki taiao nei
E tipu, e rea, E hine kahurangi ariki!
Whakamau tai, whakamau o Rongo
Whakamau taketake toitu ki taiao nei, E hine ariki rangi...e!
E tipu, e rea koe he whatu ioio nui, he whatu io matua
He io taketake ki taiao nei, E Hine-rauwharangi...e!*

Ka tu nga tangata ki te maioha ki a Hine-titama me Hine-rauwharangi i konei. Ka mutu te maioha katahi ka mauria te whariki wharanui ka horahia ki te pareparenga o te awa wai takoto ai. Ka hiki a Hine-titama raua ko Hine-rauwharangi ki runga noho ai. Ka heke te tohunga ki roto i te wai tu ai, kia to nga hope te wai; ka mau ki a Hine-rauwharangi, katahi ka tohia ki te ururangi o te toi huarewa o Tikitiki-o-Rangi.

***Whatungarongaro te tangata******Toitū te whenua***

Man passes but the land endures.

The spiritual association with the mountains remains with us today.

An inalienable association, fused by the high priest Ngātoroirangi when he lit his symbolic fires, his te ahi kā of occupation.

To explain the physical and the spiritual affinity our ancestors held for the land one must have an understanding of the philosophy of creation as they knew it.

The vision of all creation stemming from a common ancestry established a kinship with all nature. Man, though superior by his dual personality – Te Ira Atua and Te Ira Tangata – and the last in the order of creation, acknowledged his junior status and subjugated himself to the sacred principle of kinship, respect and reverence for nature.

Unfettered then by materialistic passions, he studied nature, co-operated with nature and throughout the ages learnt to live in the tenor and rhythm of nature, creating a symphony of harmonious unison. He did not equate nature to Man, but Man to nature, and this is the very essence of our respect for those mountains. To us they are symbols to which a true leader aspired – dignity, majesty, authority.

Today we look upon them with deep respect and reverence, and a tinge of many other complementary emotions – pride certainly being one of them. Proud that they are ours – Te hā o taku maunga ko taku manawa (the breath of my mountain is my heart) – and proud that they are bequeathed to the nation who as nature lovers accord them their deep respect.

Our reverence for the mountains goes deeper, because all life originated from the same parents – Papa-tū-ā-nuku, the earth mother, and Rangi, the sky father – so that Man and all other forms are in harmony with one another in the bonds of kinship.

Conditioned then by these ties, we look upon these mountains as ancestral, and their relationship evokes memories of our human ancestors who once roamed and settled within its shadow centuries ago. By those memories the past and present mingle, ensuring continuity.

Today we sing and chant ancestral compositions, paying them homage.

The death of a chief is likened to the tip of a mountain having broken off. The stem anchor of the Arawa canoe – te Rangi haruru, or toko turua – is firmly fixed on Tongariro, with the prow anchor – toko parore – firmly fixed at Maketu on the east coast, Bay of Plenty. This gives rise to the saying mai Maketu ki Tongariro, inferring its unshakeable stability. All these are tributes paid to the mountains.

To us the mountains are symbols of the implacable authority of nature. As our ancestors saw them centuries ago, so do they now stand ageless, towering above all with sublime supremacy. Immovable, immutable and impervious to the relentless march of time. Puny Man in the face of such overwhelming evidence of the inevitable, suddenly feels small and insignificant, and so the reverence for these mountains goes further deep.

Sir Hepi Te Heuheu,

Paramount Tūwharetoa Chief, 1993.



Ka Eke ki Wairaka

*Ka eke ki Wairaka, ka tahuri whakamuri,
Kaati ko te aroha te tiapu i Kakepuku,
Kia rere arorangī te tihi ki Pirongia;
Kei raro koe Toko, taku hoa tūngane.
Nāku anō koe i huri ake ki muri;
Mōkai te ngākau te whakatau iho,
Kia pōruatia e awahi a kiri ana.
Kotahi koa koe e mihia iho ai
Ko taku tau whanaunga nō Toa i te tonga,
Nō Mania i te uru, ka pea tāua
I ngākau nui ai he mutunga mahi koe.
Kaati au ka hoki ki taku whenua tupu,
Kī te wai koropupū i heria mai nei
I Hawaiki rā anō e Ngātoroirangi,
E ōna tuāhine Te Hoata, Te Pupū;
E hū rā i Tongariro, ka mahana i taku kiri.
Nā Rangī mai anō nāna i mārena
Ko Pihanga te wahine, ai ua, ai hau,
Ai marangai ki te muri e, kōkiri!*

He whakamāramatanga:

- | | | |
|----|--------------------------|---|
| 1 | Wairaka | Ko Ōwairaka te wāhi i okioki ai rātou ko ōnā tungāne i te hokinga atu ki Taupō. I titoa e Puhīwahine tana waiata aroha ki reira. |
| 2 | Kakepuku | He maunga kei te tapa o te repo o Kawa, e tata ana ki Te Awamutu. |
| 4 | Toko | Ko tētahi ingoa ko Te Mahutu, he rangatira nō Waikato, nō Ngāti Maniapoto. |
| 9 | Toa | Ko Ngāti Toa. |
| 10 | Mania | Ko Ngāti Maniapoto. |
| 10 | Pea | Mai i te kupu Pākehā ‘pair’, arā, ka ‘piri tahi’ rāua. |
| 14 | Ngātoroirangi | Ko te tohunga nui o runga i a Te Arawa waka. |
| 15 | Te Hoata, Te Pupū | Ko Te Hoata rāua ko Te Pupū ngā tipua o ngā tuāhine o Ngātoroirangi. I a ia i mate ai i te mātaotao me te huka i runga o Tongariro, ka karanga atu a Ngātoro ki ōna tuāhine, ki a Kūiwai rāua ko Haungaroa, kia heria mai te ahi tipua i Hawaiki, hei whakamahana i a ia; koia ngā puia me ngā waiariki koropupū. |
| 18 | Pihanga | He maunga kei Tokaanu, i Taupō, e kīia ana i tautohetia e ngā maunga nunui e Taranaki, e Tongariro, ā, riro ana te maunga wahine nei i a Tongariro. Ko te Pukerōnaki tā rāua tamaiti. |



Te Waiata a Te Toko

Kei te whai mai nei ko tētahi wāhanga noa iho o te waiata aroha a Te Toko, hei waiata pōtaka te rangi o te waiata nei.

*Mei rahi te kiore,
Kua eke atu au,
Hei hari atu ki te kōtiro,
E kai rā i roto
U – te kōtiro!*

*Ka haere atu au
Ka heru i taku pane
Kia pai au ki te kōtiro
E kai rā i roto
U – te kōtiro!*

*E rere te kaahu
Whakatopa i te roto
Ārohirohi ki te kōtiro
E kai rā i roto
U – te kōtiro!*

*Mei rahi te kiore
Kua eke atu au
Hei hari atu ki te kōtiro,
E kai rā i roto
U – te kōtiro!*

He whakamāramatanga:

- | | | |
|----|------------------------|---|
| 4 | E kai rā i roto | ka ngaua te ngākau e te maumaharatanga |
| 7 | pane | he kupu anō mō te upoko, mō te makawe |
| 12 | whakatopa | he rere kau |
| 13 | ārohirohi | te mau tonu ki te wāhi kotahi i te rangi i te tino tere o te papaki o ngā parirau |



Tapu ana ngā kupu a Ngātoroirangi, i a ia te toi nuku, i a ia te toi rangi

I a ia te mana atua ki te taurapa o Te Arawa

Ka karangahia ngā āwhā tuauri e Ngātoro, piki ao haere ngā kapua ki te tihi

Tirotiro haere a Ngātoroirangi ki ngā whenua kohukohu mākūkū parapara

Whakatūria ake tana tūāhu tohutohu

Karangahia tana ope kia wehe atu rā


Tēnei te tohunga i heke i te kāwai heke rangatira

Mai i te rangi te kōrero

Koia te whāriki takapau o Ohomairangi, e rarapa nei i te paerangi!



Te Au Moko – te tāruatanga matua 5



Kupu Taka

<i>ahurea</i>	culture	<i>rangitoto</i>	lava
<i>ariā matua</i>	main concept	<i>ranunga</i>	mixture
<i>auahatanga</i>	creativity	<i>raorao</i>	level country
<i>au moko o te whenua</i>	fissure (in Earth's crust)	<i>raupapa</i>	to put in order
<i>haepapatanga</i>	responsibilities	<i>rawa</i>	resources
<i>hapori</i>	community	<i>rawa taiao</i>	environmental resources
<i>hirahira</i>	important	<i>retireti hukarere</i>	skiing
<i>hokipoki</i>	hokey pokey	<i>rokohanga</i>	consequence
<i>hū</i>	to bubble up	<i>rū whenua</i>	earthquake
<i>huānga</i>	attributes	<i>tautuhi</i>	to identify
<i>huka rewa</i>	golden syrup	<i>Te Papa Atawhai</i>	Department of Conservation
<i>kaiwhakapeto</i>	consumer	<i>tīhorehore</i>	to tear apart
<i>kāwai whakaheke</i>	lineage	<i>tikanga whaiāipo</i>	betrothal
<i>kirinuku o Papatūānuku</i>	Earth's crust	<i>tīrango</i>	to scatter, mix up
<i>koioranga tangata</i>	biography	<i>tomo moe</i>	marriage
<i>kounga</i>	quality	<i>tūhuratanga uara</i>	values exploration
<i>mahinga ohaoha</i>	economic activities	<i>tuku ihotanga</i>	heritage
<i>motika</i>	rights	<i>tūruhi</i>	tourist
<i>nekeneke</i>	movement	<i>tūtohinga</i>	charter
<i>ngā nukupapa matua o te ao</i>	tectonic plates	<i>uaratanga</i>	value
<i>ngāwhā</i>	hot spring	<i>ūkaipō</i>	home
<i>ngunguru</i>	rumbling	<i>urupare</i>	response
<i>nukuratarata</i>	mantle	<i>waiako</i>	teaching method
<i>pae tunu</i>	cooking element	<i>waiariki</i>	hot spring
<i>pahekotanga</i>	interaction	<i>wetewete</i>	to unravel
<i>pakirehua</i>	inquiry	<i>whakaahua matūrau</i>	collage
<i>panapana</i>	pushing	<i>whakaawenga</i>	affects, forces
<i>panoni</i>	change	<i>whakahaumarū</i>	safeguard
<i>papa nō te motu</i>	national park	<i>whakahiato mōhiohio</i>	to synthesise information
<i>papatau</i>	table	<i>whakahihiri</i>	inspiring
<i>pārekareka</i>	popular	<i>whakaruruhau</i>	shelter
<i>paura houru</i>	baking soda	<i>whakatau kaupapa pāpori</i>	social action
<i>puia</i>	volcano	<i>whakataurite</i>	to compare
<i>pūkenga</i>	skill	<i>whakatutukitanga</i>	accomplishments
<i>pūmanawa</i>	ability	<i>wherawhera</i>	to open
<i>puna waiariki</i>	hot pool		